

Ianuari 04 – 10

Tusi Faitau:

Salamo 41

Manatu Autu:

“Faasoa atu le Areto i luga o le ala”

Sharing bread along the way

Faafetai:

Ona o le alofa faasoa o le Atua ua faamalieina ai o tatou mana’o lelei uma. Faafetai i le galuega lilo a lona Agaga Paia, ua na faatupuina le ola fefaasoa’i i Kerisiano. Ona o Iesu Keriso o le Areto o le Ola, ua na aumaia le ola fou mo i tatou uma.

Faatoesega:

Ona ua tatou limamau e faasoa atu meaalofo a le Atua i isi. Ia faamagalo mai i tatou ona ua tatou mele tamaoaiga o le Atua, ua mafua ai ona faamativaina le tagata. Ona ua na’o na taulagi lo tatou alofa faasoa, a ua leai se faatinoga.

Manaoga:

Ia tatou aioi i le Atua ina ia tumau pea lana faasoa i le malosi ma le ola tatou te faia maloloina ai ana feau. Ia tatou talosia e saga faatupuina pea e le Atua le agaga foa’i i lana ekalesia. Tatou tatalo ia lē faaitu’au la tatou faasoa, a ia tutusa ona tatou alolofa atu i tagata.

Ianuari 11 – 17

Tusi Faitau:

Roma 10: 14 – 17

Manatu Autu:

“Faatuatua e ala i le talalelei.”

Faith through the gospel

Faafetai:

Ia tatou faafetai i le Atua, ona o le soifua faaaogaina o ana auauna o le Talalelei; ua mafai ona fesoota’i mai ai le upu o le ola i tagata uma. Ia faafetaia le galuega taugologolo a le talalelei, o lo’o faamanatu mai ai pea le faatuatua ia Iesu e ola ai.

Faatoesega:

Ia tatou faatoesē ona ua amata le folauga o lenei tausaga i lo tatou faalogologo i i'uleo pepelo e taita'ina sese ai i tatou. E ao ina tatou faamaulalo i luma o le Atua, ona o le faatuatua itiiti, ua mafua ai ona tatou faalagolago i upu a tagata, a ua le o a'oa'oga a le talalelei.

Manaoga:

Ia tatou talosia le faigamalaga a le atunuu ma le ekalesia, ia tumau e olaina le i'uleo o le talalelei e manuia ai. Ia fesoasoani mai pea le Agaga e faamanatu iā i tatou le taua o le mulimulita'i i le faasinoga a le Atua.

Ianuari 18 – 24

Tusi Faitau:

Isaia 62: 6 – 9

Manatu Autu:

“O i tatou o tagata vaai.”

We are watchmen

Faafetai:

Ia faafetaia le alofa o le Atua, o le malu tatou te nonofo ai i aso uma. Faafetai ona o le faaaogaina o i tatou e avea ma tagata vaai, e leoleoina le ola o lana lafu mamoe. Faafetai ia Iesu Keriso ma le faaolataga, ua fai ma 'olo maualuga tatou te sulufa'i i ai.

Faatoesega:

Ia tatou faatoesē i le Atua ona ua vaivai la tatou auaunaga fa'a-tagata vaai. Ia faamagalo mai le vaivai o lo tatou ola tatalo, ua faasolo ina masofa ai le pā e puipuia i tatou mai lu'itau faigata o le olaga.

Manaoga:

Ia a'oa'o mai pea lona Agaga e faamalosia i la tatou galuega faa tagata vaai. Ia faaalua pea lona mana i lona alofa tunoa e puipui ai le soifua faaleagaga o le ekalesia. Ia faatupu pea le fiafia e tatalo e le aunoa.

Ianuari 25 – 31

ASO SA O TUPULAGA

Tusi Faitau:

Sapakuka 2: 1 – 4

Manatu Autu:

“E faapefea ona tatou tula’i o se tupulaga faatuatua?”

How do we rise as a faithful generation?

Faafetai:

E tatau ona faafetaia le Atua, ona o le lototele ua tatou tutumau ai i taimi o lu’itau o le olaga. Ia viia le Atua ona o le tatalo lautele a le ekalesia, o lo’o fai ma puipuiga i olaga o tupulaga. Ia viia Iesu ona o le ola faaaogaina o tupulaga mo lana talalelei.

Faatoesega:

Ia tatou faatoesega i le Atua, ona ua avea tatou ma faaaaoao sese ua faavaivaia ai le ola taumafai o tupulaga. Ia faamagalo tupulaga i le ola faalotolotolua, pe ā fetaia’i ma taimi faigata o le olaga.

Manaoga:

Ia a’oa’o mai le loto maulalo i tupulaga ma fanau, ina ia lē ola faamaualuluga. Ia fesoasoani mai le Alii i lo tatou vaivai faaleagaga, ia faatupu ai se loto fou. Ia avea Iesu ma poutu e lalago i ai le faatuatua o tupulaga o Samoa.

Fepuari 01 – 07

Tusi Faitau:

2 Korinito 4: 1 – 6

Manatu Autu:

“Tatala o tatou loto ma faaulufale Keriso i o tatou olaga”

Open our hearts and welcome Christ into our lives

Faafetai:

Ia faafetaia le mana taitai o le Atua, o loo manuia ai lotoifale o aiga, nuu ma le ekalesia. Faafetai ua tatala loto o tagata, ua mafai ai ona faasoa le alofa ma faatupuina ai le filemu o le Alii. Faafetai i le

finagalo alofa o le Alii, ua tatou ola ai e ala ia Iesu Keriso ma lona soifua atoatoa na ofofua ina mai.

Faatoesega:

Ia tatou faatoesega ona o loto ua le lelei i le vā ma isi tagata, ua le maua ai le nofo fealofani. Ona o le leai o se loto faamagalo, ua le atagia ai le Keriso o lo’o faavae ai lo tatou ola faatuatua.

Manaoga:

Ia avea le alofa o Iesu, e fai ma ki e tatalaina ai o tatou loto tapunipuni. Ia faatupuina pea e le Atua o tatou loto lelei, e faatupu tele ai le fia fai mea sili mo ia atoa ma isi tagata. Ia nofotupu Keriso i o tatou olaga, e fai ma alāfua o le ola i aso uma.

Fepuari 08 – 14

Tusi Faitau:

Faataoto 1: 5 – 9

Manatu Autu:

“Ia ‘aue ne’i galo”

Lest we forget

Faafetai:

Ia faafetaia le Atua i lona alofa faifaipea mo i tatou le fanau a tagata. Faafetai i le galuega taulogologo a matua ma faifeau mo fanau i aoaoga a le Tusi Paia e manuia ai. Ia viia le Atua, o lē na faia le faaolataga i le soifua atoa o Keriso Iesu.

Faatoesega:

Ia faatoesega ona ua galo ia te i tatou le Atua, ina ua faamoemoe i le atamai o le tagata. Ia faamaulalo i le Atua, ona ua vaivai le olaga o fanau ma tupulaga talavou, ona ua mamafi i mea faafiafia o le lalolagi, ae galo ai le Atua.

Manaoga:

Ia tatou talosia pea le galuega tala’i a le ekalesia, ia mafai ona lagonaina ma taofimau e tagata uma. Ia galue mai pea lona Agaga Paia,

e faamalamalama atili i tatou i ana afioga. Ia faatupu pea le fiafia i tagata lotu uma, e faitau ma suesue i le Tusi Paia, ia iloa atili ai le finagalo moni o le Atua.

Fepuari 15 – 21

Tusi Faitau:

1 Timoteo 4: 11 – 16

Manatu Autu:

“Usita’i muamua, faitio mulimuli”

Obey first, complain after

Faafetai:

Ia faafetai i le Atua, ua na faatupu lo tatou faatuatua tatou te usitaia ai lona finagalo. Faafetai ua faatonu folau mai lana upu mamana, e tapasāina ai lo tatou ola. Ia saga viia pea le soifua ofoina mai o Keriso i le faaolataga, o le alafua o le usita’i e sili ona atoatoa.

Faatoesega:

Ia faamagalo mai i tatou, ona ua muamua ona tatou faitio ma tomumumu ae mulia’i ona usita’i ma faatino. Ia faatoesega ona ua tele ina tete’e fanau i matua, ma le faia ai le tautua e tatau ona fai. Ia faamagalo mai le ekalesia, pe afai ua tu’uitiitia lana galuega taulogologo i tupulaga o nei aso.

Manaoga:

Ia fesoasoani mai lona Agaga, e faatamaoaigaina le galuega apoapoa’i a le ekalesia i fanau ma tupulaga. Ia faamanuia fanau talavou uma a le ekalesia, ia avea i latou o ni fetu pupula o le talalelei. Ia aoao mai pea i tatou, ina ia faia le tautua i lana feau ma le lē muimui.

Fepuari 22 – 28, 2026

Tusi Faitau:

Isaia 41: 17 – 20

Manatu Autu:

“E faasoa le Atua i ē matitiva ma puapuagatia”

God provides for the poor and the suffering

Faafetai:

Ia tatou faafetaia le alofa faasoa o le Atua, e le o lagonaina ai se i’uleo o le galala ma le matelaina i Samoa. Faafetai ona e le o mate puna’oa o tamaoiga i le eleele, le sami ma le vaomatua e tua i ai le ola i aso uma. Viia le Atua ua faatamaoagaina i tatou i le ola fou ia Iesu Keriso.

Faatoesega:

Ia tatou faatoesega i le Atua, ona ua tatou faamoemoe i mea ua maua ma le filemu. Ia faamagalo mai lo tatou meleina o ana meaalofo. Faatoesega ona ua tatou valaau i le faasoa tutusa a le Atua, a ua sili ona faaitu’au la tatou faasoa.

Manaoga:

Ia tatou talosia i latou o puapuagatia ma matitiva i le lalolagi. Ia faatupuina pea le agaga fesoasoani o le ekalesia i ona tagata lotu uma lava. Ia lavea’i mai i tatou nai le ola matau’a ma le losilosu vale.

Mati 01 – 07

Tusi Faitau:

Teuteronome 16: 18 – 20

Manatu Autu:

“O le amiotonu a le Atua e ala mai ē ua valaauina”

God’s righteousness through his anointed servants

Faafetai:

Ia tatou faafetaia le Atua i lona faaaogaina o i tatou, e galulue ma tautua i so’o se valaauina. Faafetai i Lana Afioga Paia o lo’o faapupula

mai ai pea Lana amiotonu, e tatau ona savavali ai tagata uma. Faafetai i Lana amiotonu ia Iesu Keriso ma le faaolataga.

Faatoesega:

Ia faatoesega ona ua tatou le faia le amiotonu e finagalo ai le matai. Ia faamagalalo la tatou taitaiga i so'o se tafa o le valaauina, ona ua faamuamua le mana'o ma le tuinanau. Ia faatoesega ona ua aliali le faafiaamiotonu o le tagata ae natia ai le amiotonu a le Atua.

Manaoga:

Ia fesoasoani mai le Atua i a tatou matafaioi faa-uauna, ia iloa ona savavali ai i ala o lana amiotonu. Ia faasino mai faai'uga lelei ma filifiliga sa'o, ia mapu ai tagata i le filemu. Ia foa'iina mai le loto mataala, ia faatino ai auaunaga ma le faautauta. Ia agalelei le Atua, i le ekalesia ma ana tofiga eseese.

Mati 08 – 14

Tusi Faitau:

Efeso 1: 15 – 23

Manatu Autu:

“O le tatalo e faia pea mo le au faatuatua”

The unceasing prayer for the faithful

Faafetai:

Ia viia le Atua ona o le soifua tatalo o lana ekalesia. Ia faafetaia le galuega alofa o lo'o faatino e lana fanau faatuatua i so'o tafa o le lalolagi. Ia faafetai ona o i latou ua galulue ma le lē faalogologo tiga, i le galuega o le talalelei.

Faatoesega:

Ia faamagalalo mai lo tatou ola faapalapala ma le ola lē faamaoni. Ia faatoesega ona o le vaivai o lō tatou ola tatalo mo isi tagata. Ia faamagalalo mai i tatou, ona e galo pea galuega lelei o lo'o faatino e nisi o tatou uso a kerisiano.

Manaoga:

Ia tatou talosia le galuega tatalo a le ekalesia ia tumau lona faamaoni. Ia fesoasoani mai le Atua e faatupu le agaga fefaapalepalea'i o lana fanau faatuatua, e galulue faatasi ai mo le manuia o ana feau.

Mati 15 – 21

Tusi Faitau:

Galuega 9: 36 – 43

Manatu Autu:

“E tautala’aso galuega lelei o le faatuatua mo le Alii”

Good deeds of faith for the Lord will be remembered

Faafetai:

Ia viia le Atua ona o le faaaogaina o i tatou, e galulue i so’o se tiute ma se tofi ua valaauina ai. Faafetai i lana meaalofo o le loto fuatia ifo, ua faatupu ai galuega lelei mo lana ekalesia. Faafetai i le taulaga togiola, o lo’o faamanatu mai ai pea le galuega faaola na faia e Iesu mo tagata uma.

Faatoesega:

Tatou faatoesega, ona e tele ina tatou faoa le viiga o le Atua i mea tatou te fai. Ia faamagalo i tatou, ona ua tatou auauna ona o le vaaiga a tagata, ae lē mo le Atua. Ia tatou faamaulalo i luma o le Atua ona o lo tatou ola muimui ma le tautua paō.

Manaoga:

Ia talosia le feagai ai o nai a tatou aulotu ma galuega atia’e. Ia i ai pea lana taitaiga mana i loto o le Au Kerisiano, e faatino ai galuega lelei uma. Ina ia aua ne’i faoa le viiga o le Atua i ni taumafaiga lelei ua tatou ausia.

Mati 22 – 28

Tusi Faitau:

Manatu Autu:

Salamo 22: 1 - 8

“Vavae ese mai le Atua.”

Separation from God

Faafetai:

Ia faafetaia le Atua ona o lona le tu’una o tatou i so’o se taimi o le olaga. Ia viia le Atua i lona alofa tunoa e faavavau, e ala ia Iesu Keriso ma le faaolataga na saunia mo i tatou.

Faatoesega:

Ia faatoesi i le Atua, ona o le ola femoumoua’i ma le faatuatua itiiti o le tagata. Ona ua tatou fesiligia lona mafuta mai i taimi e lutia ai i tatou i puapuaga. Ia faamagalo lo tatou faafitia o lo tatou ola molimau pe a fesaga’i ma tofotofoga.

Manaoga:

Ia faatumauina e le Atua lo tatou ola faatuatua pe a oo mai faafitauli o le olaga. Ia tautoalua i tatou e lona Agaga, i ituaso e lamatia ai e le fili ma ana mailei. Ia malamalama pea la tatou vaai i ala eseese o tofotofoina ai lo tatou faatuatua i le galuega atia’e mo lana ekalesia.

Mati 29 – 04 Aperila

Tusi Faitau:

Manatu Autu:

ASO VAIASOSA PAIA

Salamo 118: 21 – 27

“Ia i le Tupu o tupu le mamalu ma le viiga”

Unto the King of kings be the power and the glory

Faafetai:

Ona o le soifua vivii o le ekalesia i le Atua. Aua ua faaalua Lana amiotonu i le lalolagi ma mea uma. Ona o le alofa tunoa o le Atua, ua le fano ai se tasi e faatuatua ia te ia, a ia maua le ola faavavau.

Faatoesega:

Ona ua faasilisili i o tatou loto le mamalu faalelailagi. Ona ua tele ina tatou fao le viiga o le Atua le Tupu silisili e faavavau. Ona ua tatou le maua le loto maulalo, tatou te faasili ai nisi i o tatou manatu. Ona ua le viia le suafa o le Atua i tapuaiga, ona o le Ola tusitusilima ma le manatu faapito.

Manaoga:

Ia tatou talosia le ekalesia ma lana galuega molimau, ina ia tala'iina ai pea le suafa o le Atua silisili ese. Ia tafiesea e le mana o le Atua ni faiga faatupu mala ua aafia ai le ola tapuai o ona tagata.

Aperila 05 – 11

Tusi Faitau:

Manatu Autu:

VAIASO O LE TOETU

Roma 5: 3 – 5

“O le manulauti sili o le Kerisiano.”

A Christians holy grail

Faafetai:

Ona e le mate le faamoemoe o le Atua mo le Kerisiano faatuatua. Ona ua ia faatoilalo le oti, le toe fili matautia i le ola o le tagata. Ona o Iesu Keriso le manulauti ma le faamoemoega tatou te maua ai le ola e faavavau.

Faatoesega:

Ona ua faaiaina pea lo tatou ola molimau i le talalelei, talu le itiiti o lo tatou faatuatua. Ona o le avea o le tamaoaiga, le pule ma le mamalu, ma mea sili ua tatou faalagolago i ai. Ona ua tatou le faia ni lu'itau aoga, mo fanau ma tupulaga o nei ma taeao.

Manaoga:

Ia tatou talosia pea le galuega tala'i, ia saga alagaina ai pea le Keriso o le manumalo. Ina ia avea pea le toetu e fai ma autu i i le ola o so'o

se Kerisiano. Ia avea le alofa tunoa o le Atua, ma faamoemoe e malolosi ai lana ekalesia i aso uma.

Aperila 12 – 18

Tusi Faitau:

Mika 3: 9 – 12

Manatu Autu:

“E mautinoa, le i ai o le faamoemoe i le taulogologo.”

Surely, there is hope in sharing

Faafetai:

Ona o Afioga Paia a le Atua, o lo’o taulogologo ai pea lo tatou ola faale-faatuatua ina ia mausali. Ona o le Atua o le amiotonu mo mea uma ua tatou manuia ai. Ona o Iesu Keriso le Atua ua liutino tagata, na saunia lo tatou faaolataga.

Faatoesega:

Ona ua vaivai la tatou galuega taulogologo i upu o le ola, ae malosi le faalele o upu o le matau’a ma le taufaa’oleole. Ona ua tatou faalogo pea i le a’oa’o mai o afioga a le Atua, a ua tatou le lagonaina. Ona o le pule sauā ma le alofa, ua mate ai le faamoemoe ola o isi tagata.

Manaoga:

Ia tatou talosia i latou uma o sauaina, ona o la latou molimau i le upu moni. Ia fai ma fu’a taualuga i le feau a le au faatuatua, le manumalo o Keriso i le oti ma le tuugamau. Ia avea pea le ekalesia ma punavai ola, e tafe atu ai le faamoemoe ola o le talalelei, i lana galuega tala’i.

Aperila 19 – 25, 2026

Tusi Faitau:

Eperu 12: 3 – 11

Manatu Autu:

“Faatonutonu e le faatuatua”

Governed by faith

Faafetai:

Ona o le faatuatua o tatou augatamā ma tuua ua mavae, sa latou tutumau ai ma le lototele e atia'e le ekalesia. Ona o le galuega faamalosiua a le Agaga Paia, ua faatupu ai lo tatou faamaoni i le Alii. Aua o lo'o a'oa'o mai pea le finagalo o Iesu, e maua i tatou e puapuaga, a ia tatou lototetele ua manumalo i le lalolagi.

Faatoesega:

Ona o le ola faapalapala, ua faoa ai le filigā e tauivi ma le mautinoa i le alofa o le Alii. Ona ua vaivai le faatuatua, ua solomuli gofie ai i lu'itau o le galuega tala'i. Ona ua tatou lilifa i a'oa'oga e tala'i ai le ola faafifilemu ma le saolotoga e aunoa ma ni galuega.

Manaoga:

Ia tatou talosia pea a'oa'oga a le talalelei, ia fai ma faamanatu taua le ola faamoemoe i le Alii i taimi uma. Ina ia lē mate le a'oa'o atu o le Tusi Paia i tupulaga ma fanau, e saga faatupu ai le faatuatua. Ia faamanuia le Atua i le galuega tala'i o le faatuatua, i le ekalesia i Samoa ma atunuu e mamao.

Aperila 26 – 02 Me, 2026

Tusi Faitau:

Esekielu 37: 7 – 10

Manatu Autu:

“O le ola fou mo ivi mamago”

New life for dry bones

Faafetai:

Ona o vavega ma faaaliga o le Atua e saga fafagu mai ai pea i tagata uma, e silisili ese lona mana faatupu ola. Aua o lo'o a'oa'o mai pea le Tusi Paia, i mea ofoofogia na faia e le Atua i ona tagata. E sili ona o Iesu Keriso na faaaliga tino ai e le gata i le oti le faamoemoe o le Atua i le lalolagi.

Faatoesega:

Ona ua gata lo tatou faatuatua i mea ua tatou vaaia, e ui ina aoaoina i tatou e i ai le mana o le Atua i mea faigata. Ona ua mate lo tatou ola saili i le Atua. Ona ua vaivai le ola tatalo i taimi o faigata e o'o mai.

Manaoga:

Ia avea le ekalesia ma tino ola o Keriso i le lalolagi. Ia talosia le faigamalaga a le ekalesia i ituaso e feagai ai ma luitau. Ia fesoasoani mai le Agaga Paia e faatupu vavega i mea ua gata ai lo tatou iloa ma lo tatou malosi.

Me 03 – 09, 2026

Tusi Faitau:

Manatu Autu:

Sakaria 4: 1 – 6

“E manumalo pe a faatuatua i le taitaiga a le Agaga Paia”

There is victory through faith in the guidance of the Holy Spirit

Faafetai:

Ona o le ta'itai'ina pea o le Ekalesia i lona Agaga Paia, ua lē faatoilaloina ai i faafitauli ua aafia ai le lalolagi ma Samoa. Ona o le malosi lea ua faalototeleina ai pea i tatou e molimau atu le alofa tunoa o le Atua.

Faatoesega:

Ona ua tatou lē lagona le galuega lilo a le Agaga Paia. Ona o le faalagolago o le tagata i lona poto, a ua le faamoemoe i le Agaga o le Atua.

Manaoga:

Ia faatuatua pea i le taitaiga mamana a le Agaga o le Atua, i a tatou galuega i la le tino ma le faaleagaga. Ia foa'i mai pea le mafanafana o lona Agaga Paia, e faavae ai a tatou filifiliga fai o aso uma.

Me 10 – 16

Tusi Faitau:

Manatu Autu:

ASO SA O TINA

Failauga 4: 9 – 12

“E sili ona lelei o le to’alua i le toatasi.”

Two are better than one

Faafetai:

Ona o le sootaga felagolagoma’i i le vā o le tane ma le fafine, o lo’o atagia ai pea le poloaiga sili ia nonofo fealofani. Ona o lo’o tauto’aluaina pea i tatou e le Agaga Paia, e faigofie ai galuega tatou te faatinoina. Ona o le alofa tunoa o Keriso ua tatou faalagolago i ai lo tatou malosi.

Faatoesega:

Ona o le malosi o le ola tu’inanau o le tagata, ua malepelepe ai sootaga mafanafana. Ona ua fia galue toatasi le tagata e aunoa ma le Alii. Ona ua fia faoa toatasi e tagata le viiga o le Atua, i mea ua ia gafatia ona fai.

Manaoga:

Ia foa’i mai le loto fiafia e galulue faatasi ai le Ekalesia, i ala i le taitaiga a le Agaga o le Atua. Ia malosi pea le agaga faauso e maua ai le loto fefaamagaloa’i. Ia mausali pea le galuega fai faatasi a le Malo ma le Ekalesia mo le manuia o Samoa.

Me 17 – 23

Tusi Faitau:

Manatu Autu:

VAIASO O LE FONOTELE

Efeso 4: 25 – 5: 2

“O taiala sili mo se olaga fou”

The best principles for a new life

Faafetai:

Tatou faafetai i a’oa’oga o le Tusi Paia o lo’o taialaina ai i tatou. Ona ua galue mai pea le Agaga Paia, e faamalamalama o tatou ala pogisa. I le faaolataga na faia e Keriso, ua faafouina ai lo tatou ola.

Faatoesega:

Ona o lo’o tumau pea i tatou i vaivaiga tuai o le olaga. Ona ua tatou fiafia e savavali pea i ala tuai. Ona ua vaivai le i’uleo faaperofeta o le Ekalesia, e folafola atu suiga sili o le ola mo le malo o le Atua.

Manaoga:

Ia soluia pea loto o kerisiano uma i le malamalama o le upu a le Alii, e fai ma faatonu i le olaga tataua o aso uma. Ia savavali pea le ekalesia i taiala o le galuega ua faasino mai e Keriso.

Me 24 – 30

Tusi Faitau:

Manatu Autu:

Galuega 20: 28 – 35

“O le fautuaga faapitoa ia faataunuaina”

An important advice to be fulfilled

Faafetai:

Ia tatou faafetai ona o fautuaga aoga a le au matutua, o loo fesoasoani mo le olaga o tupulaga o le ekalesia . Ona e le o mapu le taulogologo o le upu a le Alii, e faatonu folau ai le olaga faifaiepa. Ia tatou faafetai i le taulaga na faia e Keriso, ua a’oa’o mai ai i tatou o le ala lea e tasi e manuia ai e faavavau.

Faatoesega:

Ona ua tatou mumusu e fautuaina i tatou, pe a feagai ma luitau o le galuega a le Atua. Ona ua tatou lē usitaia le tu’ualalo a Keriso i le avea ma auauna. Ona ua le maua le sini o le faamoemoe i le ola ofoina atu, talu lo tatou faataliga tuli i aoaoga a le Tusi Paia.

Manaoga:

Ia lagona pea i o tatou loto le taua o le galuega faufautua a nai o tatou matua na asaina le gasū o le taeao. Ia maua uma e le Ekalesia le agaga felagolagoma’i, e maua ai manatu fou mo suiga lelei. Ia galue mai pea le Agaga Paia, e tu’umumusu i lo tatou vaivai faaleagaga.

Me 31 – 06 Iuni

Tusi Faitau:

Manatu Autu:

Iosua 4: 4 – 9

“Faamanatuina o le alofa o le Atua”

Celebrating God’s love

Faafetai:

Ia faafetaia le alofa o le Atua ia Samoa, ua tatou aulia manuia ai le faamanatuina o lona saolotoga i lenei tausaga. Ona o le tele o faigata ma feteena’iga eseese, ae na lavea’iina lava i tatou i lona mana faaola. Ona ua ia faasa’olotoina mai i tatou nai le pologa i le agasala, e ala ia Iesu Keriso ma le faaolataga na ia saunia.

Faatoesega:

Ona ua galo ia i tatou le Alofa o le Atua pe a manuia ni taumafaiga. Ona o lo tatou ola faafoliga, i lo tatou ta’uta’u o le alofa o le Atua, ae lē alolofa atu i isi uso a tagata.

Manaoga:

Ia avea pea le alofa lavea’i o le Atua, e fai ma fafagu taua ia Samoa ma lona Malo Tutoa’tasi. Ia pese pea i taimi uma le alofa o le Atua i aiga, o nuu ma le atunuu, aemaise o le Ekalesia. Ia ola fealolofaa’i tagata uma, faapei ona alofa mai le Atua i lana lafu mamoe.

Iuni 07 – 13

Tusi Faitau:

Manatu Autu:

Mareko 4: 30 – 32

“Suotosina ia loloto le mafutaga ma le Atua”

Rooting a deeper relationship with God

Faafetai:

Ona o le faatuatua o nai o tatou augatamā, ua mafai ai ona tatou a’ea’e i faamanuiaga ma le saolotoga. Ona o le galuega lilo a le Agaga Paia, o suatia ai pea le ola faapalapala ma le faatuatua itiiti. Ona o Iesu Keriso ma le galuega o le leleiga, ua saga faatupu atili ai lo tatou faatuatua i le alofa tunoa o le Atua.

Faatoesega:

Ona ua lē atoatoa la tatou molimau i le alofa o le Atua, ona o lo tatou pupū i mea o le lalolagi. Ona o lo tatou ola paie e galulue. I le ola faalautagitagi o lo tatou faatuatua, on ua musuā e faalogo i le upu a le Atua.

Manaoga:

Ia galue mai pea le Agaga o le Atua, o le malosiaga na te faatupu lo tatou faatuatua ia maua'a. Ina ia tatou maua le faamaoni e faatino ai o tatou tiute, ia ola ma tupu tele ai lo tatou faatuatua. Ia avea pea i tatou uma faapei o le fua o le sinapi, e ui ina itiiti ae tupu lauolaola ma mafalā.

Iuni 14 – 20

Tusi Faitau:

Manatu Autu:

Tito 2: 7 – 8

“Avea ma faaa’oa’o o se olaga lelei”

Be a role model of good life

Faafetai:

Ona o apoapoa’iga lelei sa fai e nai o tatou tuaā ua lagomau mai tuugamau, ua fai ma faataitaiga aoga mo i tatou uma. I le upu a le Alii o lo’o folafola mai ai pea aoaoga lelei e fai ma taiala. Ona o le faataitaiga sili na faia e Keriso, ua atoatoa mo le ola mo soo se kerisiano faatuatua.

Faatoesega:

Ona ua avea vaivaiga faaletagata ma faataitaiga leaga mo fanau ma tupulaga o le Ekalesia. Ona ua muamua ona faaali sina iloa i le mafaufau, a ua galo ai le vā fealoa’i ma aoaoga fa’akerisiano. Ona o ā tatou amioga matagā, ua fai ma faleaoga leaga i fanau.

Manaoga:

Ia faamanaina e le Agaga le apoapoa’i a matua mo fanau, e fai ma sulu e malamalama ai o latou laasaga i manuia o le lumanai. Ia foa’i i fanau

uma le loto maulalo, e talia ai apoapoa'iga lelei a matua, faiaoga, faifeau ma tagata uma, o fesoasoani i o latou olaga.

Iuni 21 – 27

Tusi Faitau:

Manatu Autu:

Efeso 6: 10 – 13

“O ofutau atoatoa o le Kerisiano”

The complete armor of a Christian

Faafetai:

Ona o le mafanafana o le alofa o le Atua, o lo'o puipuia ai i tatou nai faaosoosoga. Ona o lo'o faamalosi pea le Agaga o le Atua ina ia tatou faia le faamaoni e finagalo i ai. Ona o Iesu Keriso ma lona alofa tunoa, ua faapaleina ai i tatou i lona manumalo.

Faatoesega:

Ona ua leai se faatuatua ma se faamaoni, e tutumau ai i le Alii i taimi o tofotofoga. Ona ua tatou lafoa'i ese ofutau e finagalo ai le Alii, talu le tuinanau ua faalavelaveina ai i tatou. Ia faamagalo mai i tatou, aua ua sili le 'oofu i tifica a le lalolagi, e gata i le tino lona matagofie.

Manaoga:

Ia tatou naunau pea e 'oofu i ofutau o le ta'ua faaleagaga. Ia tumau pea le ola faatuatua, o le faamaoni ma le filemu o le Atua i le soifua galulue o le Ekalesia. Ina ia galue mai lona Agaga e mafai ai ona tatou tauave lenei ofutau ma le lē fiu gofie.

Iuni 28 – 04 Iulai

Tusi Faitau:

Manatu Autu:

Ioane 17: 20 – 24

“Ia mafuta faatasi iā Keriso”

Unity in Christ

Faafetai:

Ona o mafutaga so'ofaatasi ua atagia ai le maopoopoga o aiga, nuu ma le atunuu e o'o lava i le Ekalesia. Ona o aoaoga a le Tusi Paia, o lo'o

faamalosia lo tatou ola galulue faatasi. Ona o Iesu Keriso le ao o le Ekalesia, ua fusia ai itutino uma i lona alofa tunoa.

Faatoesega:

Ona o fevaevaea'iga ua atagia ai le malepelepe o sootaga faa-kerisiano. Ona ua leai se maopoopoga e maua i aiga ma nuu po'o ekalesia, talu le malosi o le tiapolo. Ia faamagalo mai le Atua, i le vaivai o lo tatou ola tatalo.

Manaoga:

Ia faatumauiina le mafutaga mafanafana i le vā o matua ma fanau i aiga uma. Ia tasi le faamoemoe o Ekalesia kerisiano, faapei ona tasi le Keriso ma lona Tamā o i le lagi. Ina ia faamalosia pea le soifua tatalo o lana Ekalesia, aua o le malosiaga lea o le ola tutū faatasi.

Iulai 05 – Iulai 11:

Tusi Faitau:

Faaaliga 1: 4-8

Manatu Autu:

“Keriso, o le Alefa ma le Omega”

Christ, the Alpha and Omega.

Faafetai:

Ona o ia o le amataga ma le gataaga i mea lelei uma ua tatou maua e manuia ai. Ona o le moni ma le faamaoni o lona alofa laveai, na faaalua atoa lea ia Iesu Keriso, o le amataga ma le gataaga i le ola faavavau mo soo se tagata faatuatua.

Faatoesega:

Ona o le faapogisaina pea o lo tatou iloa o Iesu Keriso, o ia na amata mea i lo tatou faaolataga. Ia faamagalo mai o tatou leaga ma agasala uma lava i le maliu ma le toetu o Iesu.

Manaoga:

Ina ia foai mai le poto, tatou te malamalama ai i uiga loloto o ana afioga i le Tusi Paia. Ina ia faia pea lona finagalo i le lalolagi nei, e

pei ona faia i le lagi. Ia faatumauina pea ona avea o i tatou ma soo moni o Iesu Keriso.

Iulai 12 – Iulai 18:

Tusi Faitau:

Salamo 19: 1—4

Manatu Autu:

“E gagana le foafoaga”

Creation speaks

Faafetai:

Ona o le foafoaga ma lona matagofie ua foaiina mai tatou te ola ai. Ona o le matagofie o le foafoaga fou na tapenaina e Iesu mo le tagata faatuatua, i le faaolataga na ia saunia.

Faatoesega:

Ona o lo tatou faatamala e faatino a tatou galuega faa-tausimea o le foafoaga. Ona o tatou ola agasala i aso uma. Ona ua uiō le foafoaga matagofie a le Atua, ona o le manao tele o le tagata.

Manaoga:

Ina ia foai mai le faautauta, tatou te tausi ai le foafoaga ma ona uiga lasi, mo tupulaga o taeao. Ina ia feliiuaina i tatou e lona Agaga, e avea ma foafoaga fou i le ola ua faapaiaina, ma ua faaolaina mo le Alii.

Iulai 19 – Iulai 25

Tusi Faitau:

Sefanaia 1:14 – 17

Manatu Autu:

“Malaga a le tauaso”

Journey of the blind

Faafetai:

Ona o lona alofa ma lona agalelei le-mavae e le aunoa. Ona o le malamalama o lona alofa tunoa tele, o loo manuia ai la tatou

faigamalaga faale faatuatua. Ona o le malamalama o le Keriso toetu, ua tatou le toe savavali tauaso ai.

Faatoesega:

Ona o le malosi o le agasala ua na faatauasoina i tatou i ala o le Atua. Ona o le le faaaogaina lelei o tatou mata faapei ona faia ai e le Atua.

Manaoga:

Ia avea pea i tatou ma sulu e oo atu ai le malamalama o le Keriso toetu mo e o pogisa pea i le agasala. Ia galueina pea e le Agaga Paia o tatou loto ina ia manino ai uiga moni o ana afioga paia.

Iulai 26 – 01 Aukuso

Tusi Faitau:

Numera 26 : 1—4

Manatu Autu:

“O le tusiga igoa a le Atua”

God’s census.

Faafetai:

Ona o lona alofa tunoa ua aofia ai tagata uma i ona manuia. Ona o lana foai tagata e ala i fanau, ua faaopoopo i le faitau aofai o tatou aiga, nuu, le atunuu ma le Ekalesia.

Faatoesega:

Ona o le le faaaoga tatauina o tatou tagata mo feau ua ia finagalo iai mo le manuia o tagata lautele. Ona o lo tatou faatamala i le faaaogaina o ana meaalofo ua faasoa mai mo tatou.

Manaoga:

Ia aoao mai lona Agaga, ia tatou iloa ona faitau ma faaaoga tatau o tatou aso e faia ai lona finagalo i o tatou valaauina. Ia faatamaoagaina pea i tatou i ona manuia ma ana meaalofo. Ia faamanuia i o tatou laueleele, o le gataifale ma atiinae eseese, aua le manuia o tagata lautele.

Aokuso 02– 08**Tusi Faitau:****Manatu Autu:****1 Samuelu 13: 15-23****Pe a oo mai le au-faaleagamea.***When the raiders come.***Faafetai:**

Ona o lona le tuulafoaina o i tatou i o tatou ituaso e le mautonu ai. Ona o le tu'umumusu mai o lona Agaga, e tapenapena lo tatou mataala i aso uma. Ona o lona filemu tatou te maua ai lototele pe a fetaiái ma tiga ma faigata o le olaga.

Faatoesega:

Ona o lo tatou ola faatamala, e mafua ai ona satia i tatou e lē faaleaga mai, o le tiapolo lea. Ona ua matatupa lo tatou faatuatua, ona o le fefe ma le loto vaivai i mea faigofie o le ola.

Manaoga:

Ia foaiina mai le loto mataala, e tapena faale agaga ai o tatou tagata mo aso leaga. Ia i a'i tatou pea le taitaiga mana a lona Agaga Paia. Ina ia ma'ai pea lo tatou faatuatua e ala i le tatalo.

Aokuso 09 –15**Tusi Faitau:****Manatu Autu:****ASO SA O TAMA****Mataio 13: 18-23****“Fota mo le Loto”***Rich soil for soul***Faafetai:**

Ona o le talalelei, ua avea ma fota i o tatou tafue laau, ua fua tele mai ai fua lelei. Ona o ana tofiga mo o tatou tagata i tafa eseese o valaauina ma lo tatou faaaogaina.

Faatoesega:

Ona o lo tatou le olaina o lana talalelei. Ona o loo o tatou ola pea i eleele matutu ma le maveve. Ia faamagalo mai i tatou ona o le papa’u o tatou ola faatuatua.

Manaoga:

Ia tumau pea ana faamanuiaga i ai tatou ma a tatou fanau. Ia avea i tatou ma eleele lelei e tupu lauusi ai manuia o fanau ma aiga, le malo aemaise lana ekalesia. Ia tatala e lona Agaga la tatou faalogo, ia le gata i taliga, a ia goto i loto lo tatou logonaina o lona fimalo mo tatou.

Aokuso 16 – 22

Tusi Faitau:

Iopu 32: 6 – 14 - f7

Manatu Autu:

“O le soifua matua, o le meaalofo”.

Old age, is a gift

Faafetai:

Ona o le ola ma le malosi, ua foaiina mai tatou te ola ai . Ona o aso taitasi ma ona faamanuiaga ua tatou maua mai lona alofa tunoa. Ona o lana meaalofo i le soifua matua mo nai o tatou matua-tausi, o e o loo faasoa mai le sosia o ananafi mo tatou a taeao.

Faatoesega:

Ona o le le faaoga tatauina o le tele o aso o lo tatou ola, e viia ai lona suafa. Ua avea le poto ma le iloa ma ala ua tatou sii ai le mata-lalaga i le va ma e matutua.

Manaoga:

Ia faaopopo pea aso o lo tatou ola e tatou te auauna ai ma tautua ai lona finagalo paia. Ia foai mai lona poto ma ana faamanuiaga ma ona tamaoiga e tatou te ola ai.

Aokuso 23 –29

Tusi Faitau:

Manatu Autu:

1 Korinito 10: 18 – 25

“O le mana o le satauro”

The power of the cross

Faafetai:

Ona o le leleiga na ia saunia e ala i le satauro. Ona o le mana o lona maliu i le satauro, ua faatoilaoina ai Seoli i lona toetu.

Faatoesega:

Ona ua tatou augatatā e amo o tatou satauro ma mulimuli i le na valaauina i tatou. Ona o loo tatou faasatauroina pea lo tatou Alii i o tatou uiga ma amioga.

Manaoga

Ia faamalosi mai lona Agaga i la tatou amoga satauro i luitau ma faigata o loo feagai ma soo se valaauina. Ia tatou tatalo mo kerisiano uma o feagai ma le sauaina ona o le talalelei i le satauro o le Keriso toetu.

Aokuso 30 – Setema 05

Tusi Faitau:

Manatu Autu:

ASO SA O LE TALALELEI

Mataio 5: 14 – 16

“Susulu atu faapei o moli i le pogisa”

Shine as lights in the dark.

Faafetai:

Ona o Iesu, o le malamalama moni ua faamalamalamaina ai o tatou tagata pogisa. Ona o le faaaogaina o tatou tagata e avea ma malamalama o lana talalelei.

Faatoesega:

Ona o lo tatou le olaina o le malamalama o Keriso i le tele o aso o lo tatou olaga. Ua fai i tatou ma pouliuli i olaga o e o fia maua le malamalama o Keriso.

Manaoga:

Ia faatupuina pea lo tatou fiafia e ola i lona malamalama. Ia soo le lalolagi atoa i le susulu atu o le malamalama o lana talalelei.

Setema 06 – 12

Tusi Faitau:

Manatu Autu:

Faataoto 17: 20 – 24

“Ia loto fiafia”

“Be joyful at heart”.

Faafetai:

Ona o lana meaalofo o le fiafia e maua ai lo tatou filemu i o tatou taimi faigata. Ona o le fiafia i totonu o mafutaga, e faatupu ai le fealofani ma le galulue faatasi o le fanau a tagata. Ona o le olioli loloto i le faaolataga na tapena e Keriso mo tatou uma.

Faatoesega:

Ona o lo tatou fiafia i mea o le lalolagi e fano ai. Ona o lo tatou faatupu o le faanoanoa mo isi uso a tagata i a tatou upu ma amioga. Ona o lo tatou le-fiafia e ola mo Iesu ma lana faaolataga.

Manaoga:

Ina ia maua lo tatou fiafia e galulue pea ma le le faalogologo tiga i o tatou tiute ma faiva. Ia avea i tatou ma e fiafia mai iai le Alii, i le faatinoga o a tatou feau. Ia aumai e lona Agaga le fiafia ma le olioli e fusia ai mafutaga i totonu o aiga taitasi.

Setema 13 – 19;

Tusi Faitau:

Manatu Autu:

Efeso 6 : 18 –20

“Ia faamasani i le tatalo”

Be acquainted to praying

Faafetai:

Ona o lana faasinoga mo o tatou tagata i le auupega o le tatalo. Ona o le tatalo faatauanau a matua ua manuia ai laasaga ma lumanai o fanau.

Faatoesega:

Ona o lo tatou paie ma augatata e tatalo. Ona seiloga e lutia le ola i puapuaga, ona faato’ā tautatā lea i le tatalo.

Manaoga:

Ina ia fesoasoani mai lona Agaga ina ia tatou faamasani tatalo pea ma le faatauanau mai le loto. Ia tatou tatalo mo le lalolagi vevesi, aemaise o kerisiano o loo sauaina ona o le tala ia Iesu Keriso.

Setema 20 – 26

Tusi Paia:

Manatu Autu:

Mataio 13: 18 –23

“Se a ea e tupu mai le fatu saito?”

What becomes of the seed?

Faafetai:

Ona o lana talalelei ua fai ma eleele lelei mo le ola o le au faatuatua. Ona o Iesu Keriso ma lana faaolataga ua toe totogo ai lo tatou ola na faalautagitagi ona o le agasala.

Faatoesega:

Ona ua mamae lo tatou ola, ina ua tatou taumamao mai le eleele o le ola fou ua maea saunia e Keriso. Ona o le manumaloina pea e le alii o le lalolagi o tatou olaga i le tele o taimi.

Manaoga:

Ina ia laveaina i tatou ai le leaga ma le agasala o lenei lalolagi. Ina ia tupu ma fua tele mai lana talalelei i loto ma agaga o tagata.

Setema 27 – Oketopa 03

Tusi Paia:

Luka 14: 15 – 24

Manatu Autu:

“O le valaau lautele.”

An open invitation

Faafetai:

Ona o lana valaau mo i tatou mo lana faaolataga, e lautele ma tuu avanoa mai pea. Ona o lona amanaia o lo tatou faatauva, ma lo tatou ola agasala i le talisuaga o le faaolataga

Faatoesega:

Ona o mea ua o tatou faamuamua, ua avea ma ala o lo tatou le taliaina pea o lona valaau mai mo lana faaolataga. Ona o le sesē o valaaulia ua fiafia iai le ola o kerisiano.

Manaoga:

Ina ia o tatou tali atu i le ava ma le migao e tata ai, aua lona valaau mai mo le auai atu i lana faaolataga.

Oketopa 04 - 10

Tusi Paia:

Faataoto 10: 10 – 20

Manatu Autu:

“E iloa oe i au upu “

You are known by your words

Faafetai:

I le poto ua matou iloa ai ona tautatala i upu o le alofa ma le amiotonu. Ona o lau Tusi Paia ua matou faitau ai i upu e ola ai o matou agaga. Ona o lau upu foafoa na e saunia le faaolataga mo lo matou manuia.

Faatoesega:

Ona ua matou tautatala ai i upu ua le tusa ai ma lou finagalo paia.
Ona o a matou upu soona fai ua faatausuai ai nisi i o latou valaauina.
Ona ua valelea lava i matou.

Manaoga:

Foai mai le poto mo o matou tagata ina ia mafai ai ona matou faia o mea uma e tusa ma lou finagalo paia. Ia aoao mai ia matou iloa ona tautatala i upu o le ola ma upu o le alofa ae le o upu o le malaia.

Oketopa 11 –17

Tusi Paia:

Manatu Autu:

LOTU TAMAITI

Luka 2: 46 – 52

“O le aiga o Iesu”

Jesus’ family

Faafetai:

Ona o nai o tatou matua sa o tatou tutupu ma ola mai ai, o le faasinomaga o tatou olaga aoaoina ma o tatou olaga faa-le-agaga.
Ona o Iesu le alii-o-aiga, ua o tatou ola manuia ai.

Faatoesega:

Ona o lo tatou ola le usiusitai ma le le faalogo i nai o tatou matua.
Ona o mea ua o tatou sese ma leaga ai i totonu o tatou lotoifale faaleaiga.

Manaoga:

Ia faamanuia mai i o tatou matua. Ia faamanuia mai i nai a tatou fanau ma lo latou aso faailogaina. Ia lotolotoi pea Keriso o se totino i o tatou lotoifale, i aiga, nuu, malō ma le ekalesia.

Oketopa 18 – 24

Tusi Faitau:

Manatu Autu:

Mareko 10: 17 – 22

“O mailei o le òa”

Snares that riches bring

Faafetai

Ona o lona tamaoaiga faasoa mai i lea aso ma lea aso. Ona o le oa faaleagaga o loo fafagaina ai pea lo tatou ola faatuatua. Ona o le tamaoaiga sili i le soifua o Keriso ua faaolaina ai tatou

Faatoesega:

Ona o tatou vaivaiga faa-le-tagata, e mafua ai lo tatou manatu faapito, atoa ma le leai o se alofa. Ona ua pupu o tatou loto i le sailiga o le oa ma le tamaoaiga o le lalolagi, a ua ama ai i le sailiga o le oa faaleagaga i le ola faavavau.

Manaoga:

Ia foai mai le alofa, tatou te faasoa atu ai mo e o manaomia la tatou fesoasoani. Ia foai mai le poto ma le malamalama e mafai ai ona o tatou olaina mea ua ia finagalo i ai. Ia galue mai lona Agaga e faainoinoina i tatou i oa o le lalolagi e pala.

Oketopa 25 – 31

Tusi Faitau:

Salamo 144: 9—15

Manatu Autu:

“Atiae i le atamai “

Built by wisdom

Faafetai:

Ona o ia ua avea ma faavae papa e manuia ai aiga, nuu, le malo ma le Ekalesia. Ona o le poto ma le atamai ua foaiina mai e iloa ai ona ava ma matatau ia te ia. Ona o Iesu le faapogai o le ola manuia o tagata uma i le faaolataga.

Faatoesega:

Ona o le sese o mea o loo faavae ai o tatou olaga. Ona o le leai o se poto ma se atamai e saili atu ai mo ana faamanuiaga.

Manaoga:

Ia atiina’e pea i tatou e lona Agaga i mea lelei e manuia ai. Ia foai

mai le poto ma le atamai e malamalamaina ai mea faigata o lenei olaga.

Novema 01 – 07

Tusi Paia:

Kenese 8: 20 – 22

Manatu Autu:

“O le nanamu o Taulaga”

The scent of sacrifices

Faafetai:

Ona o mea ua e foaiina maia, ua mafai ai ona o matou toe ofoina atu ai e fai ma taulaga i lau afio. Mo Iesu le taulaga sili ua matou toe nanamu lelei ai i le faaolataga na ia saunia.

Faatoesega:

Ona o taulaga ua o matou faia e tau ina fai, ua le tusa lava lea ma lou finagalo. Ona ua saili o matou viiga ma mamalu i ā matou faigā taulaga.

Manaoga:

Ia e talia mai i matou ma a matou faiga taulaga o lenei tausaga. Foai mai mo i matou ou manuia ina ia matou faitaulaga ai mo le manuia o isi tagata. Ia viia lau Afio i le ola fai taulaga o ou tagata.

Novema 08 – 14

Tusi Faitau:

Isaia 40: 27 – 31

Manatu Autu:

“Faatalitali i le Atua”

Waiting upon God

Faafetai:

Ona o lona alofa faapalepale mo tatou tagata faatauva ma le le āuga i ona luma. Ona o lona faamaoni e faatalitali mo le tagata leiloa ina ia toe foi atu.

Faatoesega:

Ona ua faia a tatou faaiuga i le iloa faale tagata, a ua tatou le

faatalitali atu ia te ia. Ua laveia i tatou i faigata o lenei olaga, ona ua tatou taumamao mai ia te ia ma lona faatali mai.

Manaoga:

Ia oo mai lona malo ma ia faia pea lona finagalo i o tatou tagata. Ia foai mai lona manuia ma lona filemu e faasaogalemuina ai o tatou tagata mai le tele o fatiatamai o lenei soifuaga.

Novema 15 – 21

Tusi Faitau:

Salamo 37: 23 – 28

Manatu Autu:

“O se ola ua tauleleia i le Atua”

A praiseworthy life to God.

Faafetai:

Ona o lona alofa ma lona agalelei na te le tuulafoai ai o tatou tagata. Ua tauleleia lo tatou faatauvaai nai le agasala ona o le faaolataga na saunia e Iesu.

Faatoesega

Ua ta’valeina ma ta’uleagaina le talalelei e Keriso ona o lo tatou ola femoumoua’i i le agasala. Ona o lo tatou le amanaiaina oofaatinoga lelei oloo faia e nisi mo lo tatou manuia.

Manaoga:

Ina ia faamaite mai pea lona Agaga ia tatou faia ai le lelei pei ona ia finagalo ai. Ia faamanuia mai e ala i le ola auauna ma le soifua faitaulaga o lana fanau.

Novema 22 – 28

Tusi Faitau:

Salamo 103: 1- 5

Manatu Autu:

Ia faafetai i le Atua.

Be thankful to God

Faafetai:

Ia tatou faafetai ona o mealelei uma ua ia saunia mo lo tatou ola. Ona o lana foai ua mafai ona tatou toe faitaulaga atu ai ia te ia. Ona o le agalelei o nisi ua ala mai ai lona alofa mo tatou. Faafetai mo le faaolataga e ala ia Iesu.

Faatoesega:

Ona ua le atagia le atoaga o lo tatou loto faafetai i ā tatou taulaga ua ofoina mo ia. Ona ua tatou fialia e tali ona manuia e tele, e aunoa ma se loto faafetai i le tele o ana meaalofo.

Manaoga:

Ia a’oa’o mai lona Agaga, ina ia tatou iloa ona faamanuina le suafa o le Alii i aso uma o lo tatou ola. Ua tatou iloa le alofa mutimutivale o le Alii mo i tatou, ia faapea foi ona tatou faia lona alofa mo isi uso a tagata. Ia atagia le loto faafetai, i lo tatou fialia e fai taulaga mai le loto ua faamalieina.

Novema 29 – Tesema 05

Tusi Faitau:

Ioane 3:16-21

Manatu Autu:

“O ataata o taulelei i le alofa o le Atua”

Dawn of a new season in Gods love

Faafetai:

Ona o le taeao afua ua tapena e le Atua mo lana faaolataga mo le lalolagi uma. Ona ua tatou taunuu i le toe masina o lenei tausaga, i lana taitaiga mana.

Faatoesega:

Ua tatou iloa le malamalama o le faaolataga na tapena e le Atua, a ua tatou fialia pea e ola fesēa’i i le pogisa. Ona ua tatou le iloa le

atoatoa o le alofa moni o le Atua mo i tatou, e mafua ai ona tatou agasala pea.

Manaoga:

Faapei ona ositaulaga le Atua i lona soifua atoa ia Keriso, ia faapea ona aoaoina i tatou i le uiga o le ola ofoina atoa mo ia ma ana feau. Ia manuia iu o feau a nai fanau i lenei tausaga faalea’oa’oga.

Tesema 06 – 12

Tusi Faitau:

Iosua 15: 13 – 19

Manatu Autu:

“Vai mo le ola”

Water for life

Faafetai:

Mo ana meaalofo o vaitafe ma vaipuna ua inu malie ai le tagata faapea mea uma o le foafoaga. Mo le vaiola o le toetu o Keriso, ua puna ia toe ola ai le tagata agasala.

Faatoesega:

Ona ua sese magavai ua tatou feinu ai i mea le aoga o le lalolagi. Ona o lo tatou faatalale e puipui ma malutia meaalofo o le natura na faia e le Atua mo le ola lelei o lana foafoaga.

Manaoga:

Ia faamanuia mai e le Alii punaoa o lana foafoaga mo Samoa ma ona tagata. Ia faainumia pea i tatou i lona tumu faaleagaga ia faatamaoagaina ai i tatou mo ana feau.

Tesema 13 – 19;

Tusi Faitau:

Manatu Autu:

Malaki 3: 1 – 4

“Valoaga o le afio mai o le Mesia”

*The prophecy of the coming of the
Messiah*

Faafetai:

Ona o le tapenaga maeaea a le Atua mo le afio mai o le Mesia mo lo tatou faaolaina. I le olioli ua tatou maua ona o lona faamaoni i ana folafolaga mo le tagata agasala ia faamagaloina.

Faatoesega:

Ona o loto ina ma’a’a, ua faigata ona nofo tupu ai le Mesia valoia. O lo tatou ola agasala, na puapuaga ai ma masoe le Aloalii o le lagi ia toe faaolaina lo tatou faatauva.

Manaoga:

Ia o tatou onosai ma le loto maulalo e faauau le galuega faa-Mesia a Iesu, mo lana ekalesia ma ona tagata. Ia avea i tatou o ni teuteu ala mo lona afio mai mo lana galuega faaola.

Tesema 20 – 26

Tusi Faitau:

Manatu Autu:

Mataio 1: 18—25

“O le aso ua ‘ula!”

What a Day!

Faafetai:

Mo le meaalofo sili mo lenei Kerisimasi, o Iesu Keriso lo matou Alii ma lo matou Faaola. Ua aulia manuia e la matou folauga le Kerisimasi ao tumau mai pea lona alofa faapalepale.

Faatoesega:

Faamagalo mai o matou uiga ma a matou amio, ua teena ai pea Iesu le pepe o le Kerisimasi i o matou loto.

Manaoga:

Ia e faamanuia mai mo i matou ma le au kerisiano uma i le lalolagi, i lo matou faamanatuina ai o lenei Kerisimasi.

Tesema 27 – Ianuari 02, 2027.

Tusi Faitau:

Luka 13: 6—9;

Manatu Autu:

“O lena foi tausaga....”

The year that has been....

Faafetai:

Ona o lenei tausaga a mavae atu, i le faaaliga o lona alofa faamaoni mo i tatou i soo se auala. Ona o le a tatou aga atu e ulufale i lena tausaga fou, a o loo tumau mai pea lana tausiga alofa.

Faatoesega:

Ona o tatou, sese ma leaga ma agasala sa o tatou faia i lena tausaga ua mavae atu.

Manaoga:

Ia faamanuia mai, ma faatasi mai i la tatou faiga malaga mo lena tausaga ua fotuai mai. Ia avea pea o le Atua ma taitai malaga mo la tatou folauga umi o le a savalia. Manuia le tausaga fou.